

Pigisanik aalaakkaasunik piginnaatitaaffimmik pisisarneq imaluunniit atuisinnaatitaaneq pillugu Inatsisartut inatsisaat

Pigisanik aalaakkaasunik piginnaatitaaffimmik pisisarneq imaluunniit atuisinnaatitaaneq

§ 1. Inuit aamma inatsisitigut pisinnaatitaallutillu pisussaataasut, Inatsisartut inatsisaanni matumani aalajangersakkat malillugit tamanna pisussaasimangippat, Kalaallit Nunaanni pigisamik aalaakkaasumik piginnaatitaaffimmik pisisinnaangillat aammalu Kalaallit Nunaanni nunaminertanut atuisinnaatitaasinnaanatik.

Imm. 2. Aamma Kalaallit Nunaanni pigisamik aalaakkaasumik toqqaannartumik toqqaannangitsumilluunniit pissarsinnaasut atuisinnaatitaasullu, suliffeqarfinni pigineqataassutinik taasisinnaatitaanernilluunniit pigisaqarnissaq qularnaveeqqusiisuteqarnissarlunniit siunertaralugu pisinerit Kalaallit Nunaanni pigisamik aalaakkaasumik piginnaatitaaffimmik pisinertut aammalu Kalaallit Nunaanni nunaminertanut atuisinnaatitaanertut isigineqassapput. Immikkoortup immikkoortuani siullermi aalajangersagaq suliffeqarfinnut, § 5-imut ilaatinneqartunut atorneqassanngilaq.

Imm. 3. Inatsimmi matumani aalajangersakkat taamaaqataanik pilersaarusionerit aamma nunaminertat atorneqartarnerat pillugit Inatsisartut inatsisaat naapertorlugu nunaminertamik atuisinnaatitaanissamik qinnuteqaatinut atuutsinneqarput.

§ 2. Inatsisartut inatsisaat manna suliffeqarfiit pigisamik aalaakkaasumik nammineerluni inissamik atuisinnaatitaanermik pisinerannut imaluunniit utaqqiisaasumik atuisinnaatitaalernissamik pisinerannut atuutinngilaq.

Imm. 2. Inatsisartut inatsisaat Namminersorlutik Oqartussat, Naalagaaffiup, Savalimmiuni Namminersornerullutik Oqartusat imaluunniit Kalaallit Nunaanni kommunit Kalaallit Nunaanni pigisanik aalaakkaasunik piginnaatitaaffinnik pisisarneri imaluunniit atuisinnaatitaaneri, imaluunniit Kalaallit Nunaanni nunaminertanik atuisinnaatitaalertarneri ilaatinneqanngillat.

Imm. 3. Inatsisartut inatsisaanni sumiiffinni teknikkimullu atortulersuutini, Kalaallit Nunaanni Illersornissamut isumaqatigiisummi siunertanut atorneqartuni pigisanik aalaakkaasunik piginnaatitaaffinnik pissarsisarnerit imaluunniit atuisinnaatitaalernerit imaluunniit sumiiffinnut atuisinnaatitaalertarnerit ilaatinneqanngillat.

Imm. 4. Oqaasertaliussamut Pituffimmi Illersornissaqarfik ilaatinneqanngilaq.

§ 3. Inuit danskisut innuttaassuseqartut Kalaallit Nunaanni pigisanut aalaakkaasunut piginnaatitaanermik imaluunniit atuisinnaatitaanermik pisisinnaapput.

§ 4. Inuit danskisut innuttaassuseqanngitsut Kalaallit Nunaanni pigisanut aalaakkaasunut piginnaatitaanermik imaluunniit atuisinnaatitaanermik pisisinnaapput inuk pineqartoq:

- 1) Kalaallit Nunaanni aalajangersimasumik najugaqarpat, aammalu ukiut marluk siuliini sivilisunerusumiluunniit inuit allattorsimaffianni nalunaarsorsimappat, aamma
- 2) Kalaallit Nunaannut tamakkiisumik akileraartussaataappat, aammalu ukiut marluk siuliini sivilisunerusumiluunniit Kalaallit Nunaannut tamakkiisumik akileraartussaasimappat.

§ 5. Aningaaseriviit, realkredit-imik taarsigassarsititsisarfiit, ingerlatseqatigiiffiit aningaasaliissutininik aqutsisartut, sillimmasiisarfiit, taakkunungalugu ilanngullugit inuunermut sillimmasiisarfiit kiisalu soraarnerussutisiassanut aningaasaateqarfiit aamma suliffeqarfiit soraarnerussutisiassanik katersuisarfiit il.il., Danmarkimi, Kalallit Nunaanni imaluunniit Savalimmiumi najugaqartut, aammalu Finanstilsynet-imit imaluunniit Tryggingareftirlitið-imit nakkutigineqartut, Kalaallit Nunaanni pigisanut aalaakkaasunut piginnaatitaaffimmik atuisinnaatitaanermilluunniit pisisinnaatitaapput, kiisalu nunaminertanik atuisinnaatitaalersinnaallutik.

§ 6. Ingerlatseqatigiiffiit aningaasaliisartut, Kalaallit Nunaanni najugaqartut Kalaallit Nunaanni pigisanut aalaakkaasunut piginnaatitaaffimmik pisisinnaapput imaluunniit atuisinnaatitaalersinnaapput, ingerlatseqatigiiffiup aningaasaliisartup aningaasaataanik tamarmiusunik pigisaqarunik, aammalu taasisinnaatitaanerit tamarmik inunnit §§ 3-4-mi taaneqartunit toqqaannartumik taasisinnaatitaaffigineqarpata.

§ 7. Inuit imaluunniit suliffeqarfiit, akuerineqarnerit, akuersissutit uppernarsaatilluunniit atuuttut, aalisarnermut Inatsisartut inatsisaat, aatsitassanut tunngasunik suliaqarneq pillugu Inatsisartut inatsisaat, najukkani aatsitassanut tunngasunik suliaqarneq pillugu Inatsisartut inatsisaat, aatsitassat pillugit ingerlatallu tamatumunnga pingaarutillit pillugit inatsisartut inatsisaat (aatsitassanut ikummatissanullu inatsit), takornariartitsinermut aamma inuussutissarsitugalugu suliaqarnermi nunap aggornerinut il.il. Inatsisartut inatsisaat, imaluunniit sumiiffinni toqqaarneqartuni takornariartitsisarnissamut akuersissutinut Inatsisartut inatsisaat imaluunniit Sermip erngullu niuernikkut iluaqutigineqarnissaat pillugu Inatsisartut inatsisaat naapertorlugit Naalakkersuisunit tunniunneqartut tunngavigalugit suliarnikkut ingerlatsisut, Kalaallit Nunaanni pigisanik aalaakkaasunik, suliffeqarfimminni atugassaminnik piginnaatitaaffimmik pisisinnaapput imaluunniit atuisinnaatitaalersinnaapput

§ 8. Kalaallit Nunaanni peqatigiiffiit soqutigisaqaqatigiiffillu, suliffeqarfimmik inuussutissarsiorfusumik ingerlanngitsut, peqatigiiffik soqutigisaqaqatigiiffilluunniit CVR-imi Kalaallit Nunaanni angerlarsimaffeqartutut najugaqartutullu nalunaarsorsimappat, tamannalu ukiuni marlunni siuliini sivilisunerusumiluunniit ingerlaannarsimappat, Kalaallit Nunaanni pigisanut aalaakkaasunut nunaminertanullu piginnaatitaaffimmik atuisinnaatitaanermilluunniit pisisinnaatitaapput, kiisalu nunaminertanik atuisinnaatitaalersinnaallutik.

§ 9. Inuit suliffeqarfillu, §§ 3-8-imi piumasaqaatinik naammassinninngitsut taamaallaat Naalakkersuisut siumoortumik allakkatigut akuersissuteqarnerini Kalaallit Nunaanni pigisanik aalaakkaasunik

piginnaatitaaffinnik pisisinnaapput atuisinnaatitaalersinnaallutilluunniit.

Imm. 2. Naalackersuisut qinnuteqaatip nalilersorneqarnissaanut atugassanik allakkianik paasissutissanillu annertunerusunik saqqummiussinissamik qinnuteqartoq pisussaaffilersinnaavaat.

Imm. 3. Naalackersuisut akuersissutaat sukumiisunik atugassaqartitsiffulluni piomasaaqateqartinneqarlunilu, aammalu piffissamut killilerneqarluni nalunaarutigineqarsinnaavoq.

Imm. 4. Naalackersuisut pigisamut aalaakkaasumut atuisinnaatitaagallartarneq pillugu maleruagassanik, ilanngullugulu atuisinnaatitaagallarnermut piffissap sivisunerpaaffissaa pillugu maleruagassanik, aalajangersaasinnaapput.

§ 10. Kalaallit Nunaanni pigisamik aalaakkaasumik piginnaatitaaffimmik imaluunniit atuisinnaatitaaffimmik kingornussinikkut, soorlu kingornussassanik suliaqarfiunngitsumik tigusinikkut imaluunniit ataatsimut pigisanik agguaanikkut tigusisoqassappat, § 9 malillugu Naalackersuisut akuersissuteqarnissaat pisariaqanngilaq. Tamannattaq Kalaallit Nunaanni pigisamik aalaakkaasumik ilaqtariinni siulinut kinguaanullu tunissutigineqartumik piginnaatitaaffimmik pissarsinermut imaluunniit atuisinnaatitaaffimmut atuuppoq.

Atortussaatsinnginneq il.il.

§ 11. Kalaallit Nunaanni pigisamik aalaakkaasumik, inatsimmi matumani aalajangersakkat uniorlugit piginnaatitaaffimmik pissarsineq imaluunniit atuisinnaatitaaneq atuutsinneqartussaangilaq.

§ 12. Kalaallit Nunaanni pigisamik aalaakkaasumik piginnaatitaanermik pissarsiamik imaluunniit atuisinnaatitaanermik Kalaallit Nunaanni Eqqartuussivimmuut nalunaarsugassamik nalunaaruteqarnermi, imaluunniit nunaminertamik atuisinnaatitaanermik qinnuteqarnermi, pisisup qinnuteqartulluunniit §§ 3-8-imi imaluunniit § 10-mi piomasaaqatit malillugit naammassisimangippagit, Naalackersuisuniit akuersissut takutinneqassaaq.

Imm. 2. Kalaallit Nunaanni Eqqartuussiviup Kalaallit Nunaanni pigisamik aalaakkaasumik piginnaatitaaffimmik pissarsiaq imaluunniit atuisinnaatitaaneq, oqaasertaliussami matumani aalajangersakkanut uniuttoq nalunaarsugassanngorlugu nalunaarutigineqarpat piomasaaqat itigartissavaa.

Imm. 3. Naalackersuisunit akuersissutitaqanngitsumik Kalaallit Nunaanni nunaminertanik atuisinnaatitaanissamut qinnuteqartoqarnerani qinnuteqartup §§ 3-8-mi piomasaaqatit naammassisimangippagit, imaluunniit qinnuteqartoq § 10-mut ilaatinneqanngippat, Nunaminertanik atugassaisarnermut oqartussaasut itigartitsissapput.

Avaqqussineq

§ 13. Inatsisitigut isumaqatigiissutit, oqaasertaliussami matumani maleruagassanik saneqqutsiniarnermik siunertaqarluni isumaqatigiissutigineqartut ilimagineqartariaqartut atuutissanngillat.

Pineqaatissiinerit

§ 14. Inatsisartut inatsisaat manna uniorlugu Kalaallit Nunaanni pigisamut aalaakkaasumut piginnaatitaaffimmik imaluunniit Kalaallit Nunaanni nunaminertamik atuisinnaatitaanermik pisisoq, Kalaallit Nunaannut Pinerluttulerinermi inatsimmi maleruagassat malillugit akiliisitsinikkut pineqaatissinneqarsinnaavoq.

Imm. 2. Najoqqutassanut § 9, imm. 4 naapertorlugu aalajangersarneqartunut Kalaallit Nunaannut Pinerluttulerinermut inatsimmi maleruagassat malillugit pineqaatissiinernik akiliisitsinertut ilusilinnik aalajangersaasoqarsinnaavoq.

Imm. 3. Inatsisartut inatsisaat imaluunniit najoqqutassat Inatsisartut inatsisaat naapertorlugu aalajangersarneqartut akiliisitsinermik aalajangersaanissamik tunngavissiisimappata, akiliisitsineq Kalaallit Nunaannut Pinerluttulerinermut inatsimmi kapitali 5-imi maleruagassat malillugit inatsisitigut pisinnaatitaasumut pisussaataasumullu akiligassanngortinneqarsinnaavoq.

Imm. 4. Akiliisitsissutit, Inatsisartut inatsisaat manna, imaluunniit aalajangersakkat, Inatsisartut inatsisaat manna naapertorlugu aalajangersarneqarsimasut malillugit Nunap karsianut tutsinneqassapput.

Atuutsitsilerneq

§ 15. Inatsisartut inatsisaat ulloq 1. Januaari 2026 atuutilissaaq.

Imm. 2. Inatsisartut inatsisaat pigisanik aalaakkaasunik piginnaatitaaffinnik piginnisaqalernissaaq atuisinnaatitaalernissaaq pillugu isumaqatigiissutinut, Inatsisartut inatsisaata atuutilereernerata kingorna isumaqatigiissutigineqartunut atuuppoq.

Imm. 3. Inatsisartut inatsisaat pigisanik aalaakkaasunik atuisinnaatitaanissamut qinnuteqaatinut, Inatsisartut inatsisaata matuma atuutilernerata kingorna tunniunneqartunut atuuppoq.

Namminersorlutik Oqartussat, ulloq 20. novemberi 2025

Jens-Frederik Nielsen (atsior.)

Naalakkersuisut Siulittaasuat

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut